



Allakkiaq

Imermut Oqimaaloquttamut isumaqatigiisummik saqqummiussineq

Allakkat ulluat: 15-07-2020
Suliap normua: 2017 - 11337
Allagaatip ilisarnaataa: 13958374

Danskit Avatangiisinut Aqutsisoqarfiata imeq oqimaaloqutaq pillugu isumaqatigiisummi artikelit annertunerusumik paasinarsarniarlugit allakkiaq una suliaraa. Allakkiami imeq oqimaaloqutaq pillugu isumaqatigiisummi artikelit attuumassutillit nassuiaateqarfigineqarput. Saniatigut imeq oqimaaloqutaq kinnerillu qanoq iliorluni misissorneqartassanersoq suliarineqartassanersorlu pillugu maleruagassat arlallit allaaserineqarput. Iisimatusarnermut Avatangiisinullu Naalakkersuisoqarfik ilisimatitsisummi allannguutinik ilanngussivoq, taamaalilluni ilisimatitsissut Kalaallit Nunaanni pissutsinut naleqquttunngortillugu.

Postboks 1614
3900 Nuuk
Oqarasuaat: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Aallaqqaasiut

Umiarsuit erngi oqimaaloquttat uumasunik naasunillu, kiisalu patogeninik, umiarsualivimmi/sumiiffimmi, piffissami sivisuumi angalareerluni imermik oqimaaloquttamik kuutsitsiviusumi nassaasaanngitsunik akoqarsinnaapput. Uumasut taakku uumassusilinnut pioreersunut, taamaalillunilu najukkap imartaani avatangiisinut ulorianartorsiortitsisinnaapput. FN-ip imarsiornermi suliniaqatigiiffia, International Maritime Organization (IMO), immami pinngortitamik avatangiisinillu illersuinissamut maleruagassanik suliassaqarfimminut ilagitillugu peqarpoq.

Uumasut amerliartupiloortut ulorianartorsiortitsineri siunnerfilerniarlugit, 2004-mi Londonimi IMO-p qullersaqarfiani nunanut tamalaanut ataatsimeersuartitsineri (International Conference on Ballast Water Management for Ships, 9.-13. februaari 2004) imeq oqimaaloqutaq pillugu isumaqatigiissut akuersissutigineqarpoq. Imeq oqimaaloqutaq pillugu isumaqatigiisummi uumasut amerliartupiloortut umiarsuarni imeq oqimaaloqutaq aqutugalugu eqqunneqannginnissat siunertarineqarpoq.

Imeq oqimaaloqutaq pillugu isumaqatigiissut nunarsuarmi annertuumik siaruarsimalluni isumaqatigiissutaavoq, tassanilu umiarsuit assigiinngitsut, aammalu soqutigisalippassuit, ilaatigut nunani oqartussaasunik assigiinngitsunik, umiarsuit inuttaannik, ingerlatseqatigiiffinnik immikkoortuliisartunik (suliniaqatigiiffiit akuerisat), umiarsualivinni oqartussaasunik, imermut oqimaaloquttamut suliarinninnermi atortunik tunisassiortunik allanillu ilaqartut pineqarput.

Danmarkip isumaqatigiissut 2012-imi septembarimi akueraa. Danmarkip isumaqatigiissummut akuersinermini Kalaallit Nunaat tunuarsimaarfigineqartussangortippaa, taamaalillunilu Naalakkesuisut imeq oqimaaloqutaq pillugu isumaqatigiissut akuerissappassuk, Kalaallit Nunaata eqqaani aningaasaqarnermut killeqarfiup imartallu killeqarfiata avataaniittut kisiisa inatsisitigut sunniuteqarfigisinnaalerpai. Imeq oqimaaloqutaq pillugu isumaqatigiissut 8. septembari 2017-imi atuutilerpoq.

Danskit oqartussaasuisa imeq oqimaaloqutaq pillugu isumaqatigiissummik atuutsitsilernerminni, Imarsiornermut Aqutsisoqarfiup oqartussaasutut pisussaaffimmini suleriaasii tamanut tunngasut aallaavigaat.

Ilisimatitsissut manna imeq oqimaaloqutaq pillugu tamanut tunngasunik takussutissiorissaq siunertaralugu suliarineqarpoq.

Isumaqatigiissut taassumalu imaa

Imeq oqimaaloqutaq pillugu isumaqatigiissut 2004-mi februaarimi akuersissutigineqarmat, artikelini malittarisassanilu arlalinni, sapinngisamik pilertornerpaamik, aammalu ajornanngippat isumaqatigiissutip atuutilinnginnerani ineriartortitassatut IMO-mut kaammattuiffiusuni maleruagassiornissaq inassutigineqarpoq. Tamatumani nunarsuarmut tamarmut atugassiornissaq assigiimmillu atuutsitsilernissaq anguniarneqarpoq.

IMO-p avatangiisinut ataatsimiititaliaa MEPC (Marine Environmental Protection Committee) 2004-mi aprilimi ataatsimiinnermi MEPC51-imi maleruagassanik taakkuninnga ineriartortitsinissamut pilersarusiorpoq, pilersarut taanna juli 2005-imi ataatsimiinnermi MEPC53-imi annertusineqarpoq. Piffissami MEPC53-ip (2005-imi juulimi) – MEPC58-ip (2008-mi oktobarimi) maleruagassat katillugit 14-it ineriartortinneqarput. Tamatuma kingorna maleruagassat taakku ilaat iluarsineqarput aammalu nutaanik takkuttoqartarsimalluni.

Maleruagassat taaguusiussami tusaaneqarsinnaasutut pinngitsoorani pilersitassaangillat, taamaallaalli maleruagassiaapput, imeq oqimaaloqutaq pillugu isumaqatigiissummi maleruagassat assigiimmik atuutsinneqalernissaannut qulakkeeriniarluni ineriartortinneqartut. Taamaattumik maleruagassat allaaserisami matumani saqqummiunneqanngillat, isumaqatigiissut pillugu suliaasaqarfimmi tamarmiusumi ilitsersuutissatut annertunerusumik eqqarsaatigineqarmata. Siornatigut maleruagassiaasimasoq, ”Atortunik imermik oqimaaloquttamik suliaqarnissamut akuersisarnermut maleruagassat” ”kode”-mik, inatsisitigut pituttuisumik taarserneqarpoq. Taanna pillugu saqqummiussisoqassaaq.

Isumaqatigiissut pillugu saqqummiussineq ukuninnga imaqarpoq:

- Artikelit
- Ilanngussaq: Umiarsuarni imermik oqimaaloquttamik kinnernillu misissuisarnermut suliaqarnermullu malittarisassat.
- Kode, imermik oqimaaloquttamik suliaqarnermi atortunik akuersisarnermi atorneqartussa.

Isumaqatigiissutip ingerlaavartumik allannguuteqartinneqartarnera MEPC-p ataani pisarpoq, taakkulu pereeraangata "Aalajangersakkanik" suliaqartoqartarpoq. Taamaattumik kingusinnerusukkut allannguuteqartoqarnermoq malinnaaffiginiarlugu akuttunngitsumik IMO-p nittartagaanik alakkaasoqartarnissaa pingaaruteqarpoq.

Artikelit

Isumaqatigiissut artikelinik katillugit 22-nik imaqarpoq, taakkulu matuma kinguliani naatsuaqqamik saqqummiutissavagut.

Artikel 1 Taaguutit aamma Artikel 2 Pisussaaffiit nalinginnaasut

Taaguutinik aamma pisussaaffinnik tamanut atuuttunik imaqarpoq, tassanilu pisussaaffilerneqarnermi isumaqatigiissummi aalajangersakkat malinneqartussaapput, aammalu isumaqatigiisummik pitsaasumik atuutsitsilernissaq, malinninnissaq atuutsitsinissarlu siunertaralugit suleqatigiittoqartussaalluni.

Artikel 3 Atuuffia

Isumaqatigiissut umiarsuarnut, suleqataasut erfalasuut atorlugu angalasinnaatitaasunut, aammalu umiarsuarnut, suleqataasut erfalasuut atorlugu angalasinnaatitaanngitsunut, kisiannili suleqataasup oqartusaassuseqarnerata ataani sullissisunut atuuppoq.

Isumaqatigiissut ilaatigut umiarsuarnut, taamaallaat imartani, suleqataasup inatsisitigut oqartussaaffigisaanni angalasunut aamma sakkutuut angallataannut atuutinngilaq.

Artikel 4 Immami tappiorannartunik patogen-inillu ajoqusiinnaasunik, umiarsuit oqimaaloqutaq imeq kinnerilluunniit aqutigalugit nuussisinnaanermik nakkutilliineq

Suleqataasup isumaqatigiissummi maleruagassat malinneqarnissaat qulakkiissavaa, aammalu programminik politikkinillu, isumaqatigiissummi maleruagassat malinneqarnissaannut iluaqutaasinnaasunik ineriartortitsissalluni.

Artikel 5 Kinnernik tigooraaviit

Suleqataasup umiarsualivinni terminalinilu tigooqaavinnik naleqquttunik peqarnermoq qulakkiissavaa.

Artikel 6 Ilisimatusarnermut teknikkimullu tunngasunik ilisimatusarnek alapernaarsuinerlu

Suleqataasut immikkoorlutik imaluunniit ataatsimoorlutik imermik oqimaaloquttamik suliaqarnermi ilisimatusarnermut teknikkimullu tunngasunik ilisimatusarnermissaannik siuarsaanissaq oqilisaassinissarlu anguniassavaat, aammalu imartani inatsisitigut oqartussaaffigisaminniittuni imermik oqimaaloquttamik suliaqarnerup sunniutai alapernaarsussallugit.

Artikel 7 Takuniaasarnek uppernarsaatinillu tunniussisarnek

Suleqataasup kialuunniit umiarsuit, erfalasortik atorlugu angalasut imaluunniit oqartussaaffigisamik ataanni sullissisut, aammalu takuniarneqartussat uppernarsaatinillu tunineqartussat, ilanngussami maleruagassat naapertorlugit takuniarneqarnissaat akuersissutinillu tunineqarnissaat qulakkiissavaa.

Artikel 8 Unioqquitsinerit

Suleqataasup inatsisitigut oqartussaaffigisaani isumaqatigiisummik matuminnga unioqquitsinerit sulluunniit inerteqqutaapput, aammalu suleqataasup inatsisai naapertorlugit pineqaatissiiviussallugit.

Artikel 9 Umiarsuarni misissuisarnek

Umiarsuaq sulluunniit, Isumaqatigiissutip matuma atuuffigisaata, umiarsuarni isumaqatigiissut malinneqarnerisq erseqqissassavaa. Taamatut misissuinerit ataatsimut isigalugit uppernarsaammik atuuttumik umiarsuarmiittoqarnerisq uppernarsaasoqarnisaanut, imermut oqimaaloquttamut allattaaviup misissorneqarnisaanut aamma/imaluunniit malittarisassat, IMO-mit suliarineqartut naapertorlugit suliarineqartussat malinneqarnerisut paasiniarlugu umiarsuup imianit oqimaaloquttamit misissugassanik tigusinissamut killilerneqarput.

Artikel 10 Unioqquitsinernik uppernarsaasarnek umiarsuarnillu nakkutilliineq

Suleqataasut unioqquitsinernik uppernarsaaniarnermi aamma isumaqatigiisummi aalajangersakkanik atuutsitsinermi suleqatigiissapput.

Artikel 11 Nakkutilliinermi suliniutit pillugit ilisimatitsisarnek

Misissuinermi isumaqatigiisummik unioqquitsisoqartoq paasineqarpat, tamanna pillugu umiarsuaq ilisimatinneqassaaq. Nalunaarut unioqquitsinermut uppernarsaatinik imaqarsinnaasoq Aqutsisoqarfimmut nassiunneqassaaq (soorlu Namminersorlutik Oqartussat imaluunniit Imarsiornermut Aqutsisoqarfik).

Artikel 12 Pisariaqanngitsumik umiarsuarnik kinguaattoortitsisarnek

Suliani suniluunniit tamani artikel 7, 8, 9 imaluunniit 10 naapertorlugit umiarsuup pisariaqanngitsumik uninngatinneqarsinnaanerata kinguaattoortinneqarsinnaaneratalu pinngitsoortinneqarnissaa eqqarsaatigineqartassaaq.

Artikel 13 Teknikkimut tunngasunut ikiuunneq, suleqatigiinneq nunallu immikkoortuani suleqatigiinneq

Toqqaannartumik imaluunniit IMO aamma nunani tamalaani suleqatigiiffiit allat aqutigalugit, umiarsuit ernginik oqimaaloquttanik kinnernillu nakkutiliinissaq suliaqarnissarlu eqqarsaatigalugit tamanna naapertuuppat, suleqataasunut, teknikkimut tunngasunut ikiorteqarnissamik qinnuteqartunut tapersiinissamut suleqatigiit imminnut pisussaattipput.

Teknologiinik, umiarsuit ernginik oqimaaloquttanik kinnernillu nakkutilliinissamut suliaqarnissamullu tunniussinissaq, nunap inatsisai, peqqussutai politikkiilu eqqarsaatigalugit suleqataanissamut suleqatigiit imminnut pisussaattipput.

Suleriaatsinik naleqqussakkanik ineriartortitsinissaq pillugu nunap immikkoortuani isumaqatigiisummi suleqataasunik suleqateqarnissaq suleqataasunit anguniarneqartassaaq.

Artikel 14 Paasissutissanik ingerlatitseqqittarneq

Suleqataasup kialluunniit naleqquttutut isumaqarfigineqartumi paasissutissanik aalajangersimasunik attuumassutilinnillu suleqataasunut allanut atuisinnaalertitsinini pillugu IMO ilisimatittassavaa.

Artikel 15 Aaqqiagiinnginnerit pillugit aalajangiisarnerit

Suleqataasut isumaqatigiissutip nassuiarneqarnerani atorneqarneraniluunniit aaqqiagiinnginnerit pilersut isumaqatiginninniarnikkut, misissuinikkut, isumaqatigiissuteqartitsinikkut, isumaqatigiissuteqarnikkut, isumaqatigiissitsiniarnikkut, eqqartuussivitsigut aalajangiisitsinikkut, najukkap immikkoortuani sullissivinnik aaqqissuussinernilluunniit atuinikkut imaluunniit eqqissisimasumik iliuseqarnissamut atugassarititaasut nammineerluni qinikkat aqutigalugit aalajangiiffigisassavaat.

Artikel 16 Inuiaat inatsisaannut isumaqatigiissutinullu allanut tunngasut

Isumaqatigiisummi sukkulluunniit naalagaaffiup ataatsip inuiannut inatsisit nalinginnaasut naapertorlugit pisinnaatitaaffii pisussaaffiilu, Naalagaaffiit Peqatigiit Imartani Inatsisit pillugit isumaqatigiisummi saqqummiunneqartut kalluarneqassanngillat.

Artikel 17 Atsiortarneq, atuutsitsilertarneq, akuersisarneq, akuersissuteqartarneq atuilertarnerlu

Isumaqatigiissut 1. juuni 2004-miit 31. maaji 2005-imut IMO-p qullersaqarfiani naalagaaffinnit tamanit atsiorneqarnissamut ammavoq, tamatumalu kingorna naalagaaffinnit tamanit atuutsinneqalernissamut ammarneqassalluni.

Artikel 18 Atuutilernissaa

Isumaqatigiissut manna ullormit, naalagaaffiit ikinnerpaamik 30-t, ataatsimoorlutik nunarsuarmi umiarsuit niuffagiutit tamakkiisumik annertussusiisa 35 (femogtrediva) procentiinit annikinnerunngitsunik pigisaqartut tunuarsimaarfeqanngitsumik atuutsitsilerniarlutik, akuersiniarlutik akuersisuteqarniarlutilluunniit atsiornerniit, imaluunniit artikel 17 naapertorlugu atuutsitsilernissamut, akuersinissamut, akuersisuteqarnissamut atuulernissamulluunniit uppersaatinut pisariaqartunut qularnaveeqqusiissuteqarnermiit qaammatit aqqaneq marluk qaangiunnerini atuutilissaaq.

Artikel 19 Allanguinerit

Isumaqatigiissummik allanguinerimi suleriaasissanut takussutissianik imaqarpoq.

Artikel 20 Atorunnaarsitsineq

Ullormit, isumaqatigiissutip suleqataasumit pineqartumit atuutsinneqalerfianiit ukiut marluk qaangiunnerisa naanera aallarnerfigalugu isumaqatigiissut atorunnaarsinneqarsinnaavoq.

Artikel 21 Qularnaveeqqusiiffissaq

Isumaqatigiissummik qularnaveeqqusiissut allattaanermut, isumaqatigiissutip assilinerinik akuerisanik naalagaaffinnut, isumaqatigiissummi matumani atsiorsimasunut akuersisimasunulluunniit ingerlatitseqqilluni nassiussisussamut tunniunneqassaaq.

Artikel 22 Oqaatsit

Isumaqatigiissut ataasiinnaatillugu arabiamiutut, kineseritut, tuluttut, franskisut, russitut spaniamiutullu oqaatsit atorlugit suliarineqarpoq, taamaalillunilu allanneri tamarmik assigiimmik atorsinnaassuseqarput.

Ilanngussaq: Umiarsuit ernginik oqimaaloquttanik kinnernillu misissuisarnermut suliaqartarnermullu maleruagassat

Isumaqatigiissut artikelinik matuma siuliani saqqummiunneqartunik imaqarnermi saniatigut, aamma umiarsuit ernginik oqimaaloquttanik kinnernillu misissuisarnissamut suliaqartarnissamullu maleruagassanik arlalinnik imaqarpoq. Maleruagassat taakku immikkoortunut pingaarnernut tallimanut agguagaapput, taakkulu matuma kinguliani allaaserineqarput:

- Immikkoortoq A – Aalajangersakkat nalinginnaasut
- Immikkoortoq B – suliaqarnissamut misissuisarnissamullu umiarsuaranut piumasaqaatit
- Immikkoortoq C – Suliassaqarfiit ilaannut piumasaqaatit immikkut ittut
- Immikkoortoq D – Imerkik oqimaaloquttamik suliaqarnissamut malitassat
- Immikkoortoq E – Imerkik oqimaaloquttamik suliaqarnermut atatillugu takuniaannissamut uppersaatinillu tunniussinissamut piumasaqaatit

Immikkoortoq A – Aalajangersakkat nalinginnaasut

Maleruagassaq A-1 Taaguutit:

Taaguutinik arlalinnik imaqarpoq.

Maleruagassaq A-2 Atuineq tamanut tunngasoq:

Imermik oqimaaloquttamik imaarsineq ataatsimut isigalugu taamaallaat ilanngussami matumani aalajangersakkat naapertorlugit imermik oqimaaloquttamik suliaqarnermi pisassaaq.

Maleruagassaq A-3 Atuutsitsinngiffiusut:

Ilaatigut ajornartoornernut, atortut ajoqusernerinut, mingutsitsinermik pinaveersaartitsinermi atattillugu imermik oqimaaloquttamik suliaqarnermut atuutsitsinngiffiusunik imaqarpoq.

Maleruagassaq A-4 Immikkut ittumik akuersissutit:

Soorlu umiarsuarni, suleqataasut marluk umiarsualiviisa suliaqarfiisaluunniit akornanni aalajangersimasumik angalasuni imermik oqimaaloquttamik suliaqarnissamut immikkut akuersissutaasinnaasut sivisunerpaamik ukiuni tallimani atuussinnaanerinut maleruagassanik imaqarpoq, tamannalu Malittarisassaq 7 naapertorlugu ulorianartorsiorfiusinnaasunik naliliineq tunngavigalugu pisassaaq.

Maleruagassaq A-5 Piumasaqaatit assingusut:

Piumasaqaatit, ilanngussami matumani piumasaqaatinut assingusut, IMO-mit malittarisassiarineqartut eqqarsaatigalugit aalajangersarneqartut umiarsuarnut allanut arlalinnut, soorlu sunngiffimmut umiatsianut imaluunniit angallatinut, pingaartumik ujaasinernut annaassiniarnernullu atorneqartunut tunngasut Aqutsisoqarfimmit akuerineqartussaapput.

Immikkoortoq B – Suliaqarnissamut misissuisarnissamullu umiarsuarnut piumasaqaatit

Maleruagassaq B-1 Imermik oqimaaloquttamik suliaqarnissamut pilersaarut:

Umiarsuit tamarmik umiarsuarmi oqimaaloquttamik suliaqarnissamut pilersaaruteqassapput aammalu pilersaarummik taassuminnga atuutsitsilissallutik.

Maleruagassaq B-2 Imermut oqimaaloquttamut allattaaviit:

Umiarsuit tamarmik umiarsuarmi imermut oqimaaloquttamut allattaaveqassapput.

Maleruagassaq B-3 Umiarsuit ernginik oqimaaloquttanik suliaqartarneq:

Umiarsuarmi imeq oqimaaloqutaq qaqugukkut suliarineqartassanersoq pillugu maleruagassanik imaqarpoq.

Maleruagassaq B-4 Imerk oqimaaloquttamik taarsiisarneq:

Umiarsuarnut, maleruagassaq D-1-imi malitassanik naammassinninniarlutik imermik oqimaaloquttamik taarsiisartunut tamanut maleruagassanik imaqarpoq.

Maleruagassaq B-5 Umiarsuit kinnerinik suliaqartarneq:

Umiarsuit tamarmik qanoq iliorlutik umiarsuarmi imermik oqimaaloquttamik suliaqarnissamut pilersaarummi aalajangersakkat naapertorlugit, kinnerinik piiiaanissaannut eqqaanissaannullu maleruagassanik imaqarpoq.

Maleruagassaq B-6 Aqumiut inuttallu pisussaaffii:

Aqumiut inuttallu, umiarsuarmi suliffigisaminni imermik oqimaaloquttamik suliaqarnermut atatillugu pisusaaffitik ilisimassavaat, aammalu pisussaaffimminnut atatillugu umiarsuarmi imermik oqimaaloquttamik suliaqarnissamut pilersaarutit ilisimassallugit.

Immikkoortoq C – Suliaqartarneq ilaannut piumasaqaatit immikkut ittut

Maleruagassaq C-1 Piumasaqaatinut tapiliussat:

Suleqataasut ilaata kisimiilluni, imaluunniit suleqataasunik allanik peqateqarluni, imermi tappiorannartunik patogen-inillu ajoqutaasinnaasunik nuussinissamut pinaveersaartitsinissamut, killilersuinissamut nuutanilluunniit piiiaanissamut piumasaqaatit, immikkoortumi B-mi allassimasut saniatigut piumasaqaatinik allanik pisariaqartitsissappata, tamatumunnga maleruagassanik imaqarpoq. Suleqataasut imaluunniit suleqataasut pineqartut inuiannut inatsisit naapertorlugit umiarsuarmi malitassat immikkut ittut imaluunniit piumasaqaatit immikkut ittut naammassineqarnissaat piumasarisinnaavaat.

Maleruagassaq C-2 Sumiiffiit ilaanni imermik oqimaaloquttamik tigusinissamut mianersoqqusisarnerit aamma naalagaaffiup erfalasoqarfiusup tamatumunnga atatillugu suliniutissai:

Suleqataasup ataatsip sumiiffinni inatsisitigut atuutsitsivigisamini, sumiiffinni pissutsit ilisimaneqartut peqqutigalugit imermik oqimaaloquttamik tiguvigineqarnissaannik inassuteqarfigineqanngitsut pillugit imarsiortut nalunaarfiginissaat anguniassavaa.

Maleruagassaq C-3 Paasissutissanik ingerlatitseqqittarneq:

IMO paasissutissanik, C-1-imi aamma C-2-mi maleruagassat naapertorlugit ingerlateqqinneqarsimasunik naapertuuttumik atugassiissaaq.

Immikkoortoq D – Imerk oqimaaloquttamik suliaqarnissamut malitassat

Maleruagassaq D-1 Imerk oqimaaloquttamik taarsiissarnermi malitassat:

D-1-imi piumasaqaat naammassinniarlugu imermi oqimaaloquttamik qanoq annertutigisup taarserneqartarnissaanut maleruagassanik imaqarpoq.

Maleruagassaq D-2 Imerk oqimaaloquttamik suliaqartarnermut malitassat:

D-2-mi piumasaqaat naammassinniarlugu imermik oqimaaloquttamik suliaqartarnermut maleruagassanik imaqarpoq.

Maleruagassaq D-3 Imerk oqimaaloquttamik suliaqartarnermut atortunik akuersarnermut piumasaqaatit:

Imerk oqimaaloquttamik suliaqartarnermut atortut kode-mi (siornatigut Maleruagassaq 8, kode matuma kingulianiittoq takuuk) maleruagassat naapertorlugit akuerineartassasut aalajangersarneqarpoq, tassanili imermik oqimaaloquttamik suliaqartarnermut atortut saliisunik atuiffiusut, tamatuma saniatigut IMO-mi malittarisassat naapertorlugit akuerineqartussat pineqanngillat.

Maleruagassaq D-4 Imerk oqimaaloquttamik suliaqartarnermut teknologiit misiligutit:

Umiarsuit suliaqartarnermut atortunut misiligutunik misileraanerannut, aammalu D-2-mi malitassanut piumasaqaataasa ukiunik tallimanik kinguartinneqarnissaannut maleruagassanik imaqarpoq..

Maleruagassaq D-5 Suliniaqatigiiffiup malitassanik naliliinera:

Ataatsimiititaliaq ataatsimiinnermi, D-2-mi malitassatut aalajangersarneqartup ulloq atuutilerfissaa siusinnerpaaq, kingusinnerpaamik ukiunik pingasunik sioqqullugu ingerlanneqartussami naliliissaaq, tassanilu ilaatigut teknologiinik naleqquttunik, pitsaassusissamik angusaqarfiusinnaasunik peqarnersoq paasiniarneqassasoq aalajangersarneqassaaq, imm. 2-mi tunngavissat naliliiffigineqassapput, kiisalu pingaartumik nunani ineriartortitsiviusuni aammalu pingaartumik naalagaafiit imartallit mikisut ineriartortitsiviusut ineriartortitsinissamut pisariaqartitaat eqqarsaatigalugit inooqatigiinnermi aningaasaqarnermut sunniutissat naliliiffigineqassapput.

Immikkoortoq E – Imerk oqimaaloquttamik suliaqarnermut atatillugu takuniaanissamut uppersaatinillu tunniussinissamut piumasaqaatit

Maleruagassaq E-1 Takuniaasarnert:

Siullermeerluni takuniaanissamut, nutarterinernik takuniaanissamut, takuniaanerit akunnerini takuniaanissamut, ukiumoortumik takuniaanissamut saniatigullu takuniaanissamut maleruagassat allaaserineqarput.

Maleruagassaq E-2 Uppersaatinik tunniussisarneq atsiuisarnerluunniit:

Umiarsuit tamarmik, maleruagassaq E-1-imik atuutsitsiviusut suulluunniit, maleruagassaq E-1 naapertorlugu takuniarneqarnermini iluatsittumik misissuiffigineqarsimasut suulluunniit, uppersaatinik tunineqarnissaat Aqutsisoqarfimmiit qulakkeerneqassaaq.

Maleruagassaq E-3 Suleqataasumut allamut uppersaatinik tunniussisarneq atsiuisarnerluunniit:

Aqutsisoqarfiup qinnuteqarneratigut suleqataasoq alla umiarsuarmik takuniaasinnaavoq.

Maleruagassaq E-4 Uppernarsaatip ilusiligaanera: Uppernarsaat suleqataasup suliaqartuusup, immersugassami ilanngussaq 1 naapertorlugu oqaatsit pisortatigoortumik atugai atorlugit tunniunneqassaaq.

Maleruagassaq E-5 Uppernarsaatip sivisussusissaa atuunnissaalu: Uppernarsaatip sivisussusissaanut atuunnissaanullu maleruagassanik imaqarpoq.